

## 『我的嗜好』

Babuza Chū

Khòa<sup>n</sup>-tiōh chit-ê tē-bōk, lí chin khó-lêng ē siū<sup>n</sup>-kóng, “kî-kòai, chit-ê Babuza Chū sī teh pì<sup>n</sup> sím-mih báng? Beh iōng Pak-kia<sup>n</sup>-ōe siá Tâi-bûn? Án-ne m̄-tiōh kap iōng Pak-kia<sup>n</sup>-ōe poa<sup>n</sup> pò-tē-hì á-sī poa<sup>n</sup> koa-á-hì kāng-khóan? Gû-thâu khì tau tī bé-bīn, kiám ē thong?”

Bián kín-тиu<sup>n</sup>, Babuza bē-hiáu iōng Pak-kia<sup>n</sup>-ōe siá Hôa-bûn sī chôan sè-kài thong lâng chai ê pì-bit. I ê Hôa-bûn thêng-tō kap kok-hâu it-nî ê hák-seng bô sím-mih cheng-chha. M̄-kú nā-sī Tâi-bûn chiū m̄-sī án-ne ô! Thia<sup>n</sup>-kóng i chòe-kīn siá chit-phi<sup>n</sup> “A-Mah” ê kò-sū ū lâng thák-liáu sim sng-sng, ū lâng thák kàu bák-kho hóan âng, mā ū lâng ná thák ná khàu, koh ná khàu ná thák! Chok-chiá pún-lâng siá ôan ê sī mā kám-kak chiok kan-khó, ná-chhiū<sup>n</sup> teh beh hó ê khang-chhùi iōng iâm koh sī<sup>n</sup> chit-pái kāng-khóan! I ka-kī mā siá kàu lâu bák-sái. Chha chit-sut-á i tiōh chiù-chôa bô beh koh siá!

Lán chit-má beh kóng chit-ê tē-bōk chiū-sī i khó chho-tiong ê chok-bûn tē-bōk. Tī 1965 hit-chūn, beh thák chho-tiong ài chham-ka liân-khó. Kok-bîn Tiong-hák ài kàu 1968 chiah ū. Chiū góa ê lí-kái, Babuza tng-tong-sî pēng bô chin-chià<sup>n</sup> liáu-kái chit-ê tē-bōk ê i-sù! M̄-kú i chin hó-ūn, o-peh ioh mā hō ioh--tiōh! Hó-ka-chài, nā ioh bô tiōh lán chit-má chiū kiám chit-ê lâng lâi tau chò Tâi-bûn ūn-tōng! Sng-sit ū jōa tōa lí kiám chai?

Kî-sit i ê khì chham-ka chho-tiong liân-khó pún-sin chiū-sī chit-ê chin oh-tit thang lí-kái ê tāi-chì! I thák kok-hâu lóng-chóng mā chiah thák 5 nî koh 2, 3 kò-góeh niâ. In-ūi in tau chiok sàñ-chhiah, sàñ kàu kúi kiōng beh liâh--khì. M̄-tiōh, sàñ kàu kúi mā m̄-ká<sup>n</sup> lâi liâh, khióng-kia<sup>n</sup> ke-thi<sup>n</sup> lô-hóan! I kan-ta thák-ôan kok-hâu 5 nî, chiū khì kang-tiû<sup>n</sup> chò-kang, khì tiān-iá<sup>n</sup> hì-tâi bē ki-á-peng, thàn-chî<sup>n</sup> kā chhù--nih tau sio-thi<sup>n</sup> thang tiâh-bí. M̄-chiah kóng i bô chèng-sek tûi kok-hâu pit-giáp. Liân i kok-hâu ê pit-giáp chèng-su mā kā i ê chèk-kòan siá m̄-tiōh. Bêng-bêng i sī Chiang-hòa lâng, pit-giáp chèng-su khiok siá chò Tâi-pak lâng. Hâi i āu--lâi chham-ka Ko-tiong liân-khó hiám-hiám bē-tàng pò-miâ! Chit-chân sū āu-pái chiah koh lâi thñg .

Nā kóng-khí 1960 hit-ê pha-hng ê nî-tâi, chhiū<sup>n</sup> Babuza hit-khóan tûi chng-kha poa<sup>n</sup>-khì Tâi-pak ê chháu-tē gín-á, sông-sông, khong-khong, gōng-gōng, bóng-tóng koh hòng-tōng, thák-chheh thák 5 tang, kiám ū bat chit-tè sái-hák-á pang, sī chin ū bün-tê..! Sui-bóng kóng lâu-su ták-jít lóng ū kau-tài tiōh-ài siá-jī (chiū-si chò chok-giáp), i mā tiā<sup>n</sup>-tiā<sup>n</sup> bô siá liáu, hō in lâu-su kòng kap phah! Chún-kóng ū sī ke-kiám ū siá--kóa, siá--kòe ê jī kiám lóng chai-bat koh ê kì--tit? Che mā-sī bün-tê! Koh chài kóng, Hán-jī bô cheng-bit, lo-li lo-so, tek-ko tau chhâ-to, ti-sái lâm ke-ko, jī-pêng ē-tàng khng chià<sup>n</sup>-pêng mā ē-sái khng tò-pêng, tûi chit-ê 10 thóng hòe ê gín-á-phí, ū châi-tiāu pá-ak jōa chē? Só-i sui-jiân Babuza thák 5 nî gôa ê chheh, Hán-jī sit-châi bat bô jōa chē. Góa iáu ê kì--tit, tng i khòa<sup>n</sup>-tiōh chit-ê tē-bōk ê sī, i kan-ta bák-chiu kim-kim lâng siong-tiōng, gāng tī hia kui po kú. M̄-chai beh án-chóa<sup>n</sup>?

Hit tong-sî ê khó-chhì, ū 2 ê kho-bōk: Sng-sút kap Tiong-kok-gí. Sng-sút sī Babuza chū-pún tiōh chin ham-bān ê kho-bōk. Châi-lâi i lóng chin kia<sup>n</sup> khì kháp---tiōh. Ë kì-tit hák-hâu beh pit-giáp tián-lé chìn-chêng 3 lé-pâi, in lâu-su Lím Chúi-lâi(林水來) khì Babuza in chhù, tñg-tiōh in a-mah, kóng beh kiò Babuza khì khó chho-tiong. M̄-chai in án-chóa<sup>n</sup> kóng, kóng liáu Lím lâu-su sûi châu-khì Babuza chò-kang ê phùn-chhat kang-tiû<sup>n</sup> kā i kóng chit-chân tāi-chì. Hit-chūn ê Babuza sit-châi tûi thák-chheh bô sím-mih kah-ì. Ték-piat sī chit-ê Chúi-lâi-á-sian(tóng-óh lóng án-ne kā kiò), in-ūi i bat kā Babuza phah--kòe.

Chiū-sī hō i phah-liáu Babuza chiah khí-mo bái kā chheh lì-lì phòa, chiù-sí-chē-chōa kui-kì bô ài khì hák-hāu thák-chheh! Chóng-sī chò-kang chin thiám-thâu, chò kú mā ē siān. Ték-piat sī tī hit-ê tòk-chhái ê nî-tāi, thâu-ke sī tōa kàu ná siá<sup>n</sup>--leh! I nā khòa<sup>n</sup> lí sió-khóa bô kah-ì chiū chhut-chhiú tōa-tōa-lát kā lí pa--lòh--khì! He thâu-ke chò-sit lâng chho-ló koh ū lát, pa chit-ê lí tiòh thâu-khak moh teh sèh pòa<sup>n</sup>-kang! Mā bô sím-mih jîn-khôan ê koan-liām, hôai<sup>n</sup>-tit chiāh lâng ê thâu-lō tiòh-sī án-ne. Thâu-ke siōng tōa! Kap chit-má tú-hó tò-péng! Babuza thia<sup>n</sup>-tiòh beh týg-khì hák-hāu thák-chheh, kan-ta siū<sup>n</sup>-tiòh tī hák-hāu m̄-bián koh hō thâu-ke mā kap phah, chiâ<sup>n</sup> kín chiū tap-èng! Thèng-hāu i týg-khì hák-hāu chiah hoat-hiān i chha-put-to sím-mih lóng bē-hiáu! Án-ne sī beh án-chóa<sup>n</sup> khì kap lâng khó chho-tiong? Hó-ka-chài, chit-ê Babuza koh chiám-jiân-á ū cha-bó gín-á iân, in pan ê cha-bó tōng-ôh lóng chū-tōng châu-lâi kā tàu sa<sup>n</sup>-kāng! I chiū-sī án-ne tī 3 lé-pài lâi kā Sìn g-sút ke-kiám óh--chit--kóa. M̄-kú Tiong-kok-gí chiū bô thang án-ne óh! Kan-ta tòe lâng bóng siá, bóng khòa<sup>n</sup>, bóng thák! Mā m̄-chai teh thák sím-mih óa<sup>n</sup>-ko!

Khó-chhì hit-chit-kang, Babuza in a-mah pôe i khì. Khó-chhì-tiû<sup>n</sup> tī Sam-kong Kok-siô(三光國小), sī Babuza ê bó-hāu. Sòng-sút ê tê-bók chin hâh Babuza ê khùi-kháu, chin kín tiòh siá liáu! Koh ū sī-kan thang phak tī toh-á khùn! Áu--lâi in a-mah kā kóng, “Góa tī gōa-bīn khòa<sup>n</sup> lí teh khùn, siū<sup>n</sup>-kóng ta<sup>n</sup> pau-ún hāi..ah! Bē-hiáu siá phak teh khùn! Chit-sia<sup>n</sup> tiā<sup>n</sup>-tiòh sī ah-ñng khian kòe khe, khòa<sup>n</sup>-phòa--lah!” Bô phah-sòng Babuza chhìn-chhái khó, o-peh siá koh khó ē tiâu!!

Àu-hì thoa-pê<sup>n</sup>, kàu chit-má chiah beh kóng-tiòh chû-tê: Nā-sī hit-ê Tiong-kok-gí, he tiòh ū-iá<sup>n</sup> ū kàu hêng-gék! It-poa<sup>n</sup> chhì-tê iáu ke-kiám ē-hiáu, tòk-tòk sī chok-bûn, chhut chit-ê “in niâ khah hó” ê sím-mih “我的嗜好” ! Babuza Hán-jī chóng-a-kiōng mā chiah bat kúi jī nā-tiā<sup>n</sup>! Chhut chit-ê “嗜好” tàu-té sī sím-mih óa<sup>n</sup>-ko? Láu-sít kóng, chit-jī “嗜” Babuza kin-pún tiòh m̄-bat khòa<sup>n</sup>--kòe! Sím-mih i-sù beh ná-ē chai? Babuza mā-sī kàu chit-má chiah chai-iá<sup>n</sup> Tâi-gí beh án-chóa<sup>n</sup> thák! Tâi-gí thák-chò “sī”, piáu-sī “ài, ài chiâh, hoa<sup>n</sup>-hí “ ê i-sù. M̄-kú tng-sî kin-pún m̄-chai chit-khø ò-á han-chî ! Babuza kan-ta chai-iá<sup>n</sup> 好 ū 2 chióng i-sù:kap bái tò-péng sī hó; koh chit-ê sī ài, kah-ì. Babuza sim-koa<sup>n</sup> liâh thán-hôai<sup>n</sup>, chhân-chhân tâu-koa<sup>n</sup> kā chhiat gō-kak, kā tòng-chò kah-ì ê i-sù chiū tōa-tōa pān kā siá--lòh--khì! Tī chhù-lâi chhī péh-niáu-chhí, chhī hún-chiáu, chhī thò-á, chhī niû-á, ka niáu-chhí-á bóe-liu, sng lò-chú ang-á, tèng kan-lók, i ang-á-phiau, tiak chin-chu-á, pøah phé-sî, phah chiáu-á, tèng tang tèng sai... Hit-tang-chhün gín-á-lâng ê pø-sò lóng-chóng mā chiah hiah-ê nā-tiā<sup>n</sup>! Kán-tan láu-sít kā siá siá --chhut--lâi. Put-kóan i sam-chhit jī-cháp-it tiòh kā kau--chhut--khì. Ôan-sêng i jîn-seng ê thâu-chit-pái ê seng-hák khó-chhì!

Chiū-sī án-ne Babuza hō-lí hō-tô bong-tiòh chit-keng chho-tiong thang thák! I ê sêng-chek sī 152.8 hun. Liòk-chhú jit-kan-pô! Hit keng hák-hāu kiò-chò Tâi-pak Kōan-lip Sam-tiōng Chho-kip Tiong-hák(台北縣立三重初級中學).